

Über den 90. Psalm.

Im Thon/Kompt her zu mir spricht Gottes Sohn. fol. 59.

Du bist O Gott vñ Herr mein/ Unser zuflucht/ trost hülf
allein/ Für vnd für zu aller zeit/ Eh denn wurden die Berg
vnd Thal/ Die Erd vnd Welt erschaffen all/ bistu Gott von
ewigkeit.

In ewigkeit lebstu fürwar/ die Menschen lestu sterben gar/ du
ruffst den Menschen Kindern / Heist sie kommen wider herfür/
Nach deinem Wort vnd deinem Schwur / Lest sie das Leben fin-
den.

Den für dir sind auch tausent Jar/ Wie der tag der da gestern
war/ vnd ist bereit vergangen / Vnd wie ein Nachtwach hat ein
end/ Also stirbet der Mensch behend/ der Todt steht im verhanden.

Du lest den Mensch hinfahren schnell/ Gleich wie ein Strom
hat sein Gefell/ Vnd wie der Schlaf herdringet / Gleich wie ein
schönes grünes Gras/ das lieblich anzusehen was/ verwelcket vnd
vmbkommet.

Des Morgens blüht es schön vnd roth/ Am Abend wird es
welck vnd todte/ wenn es wird abgehawen/ Es verdorret bald ganz
vnd gar/ das wir es nicht kennen fürwar / wenn wir es thun an-
schawen.

Das macht dein Zorn vnd vnd grosser grim / das wir verge-
hen vnd fallen vmb/ vnd also plötzlich sterben / Das wir müssen so
schnell von hin/ Eh wirs meinen in vnserm sinn/ Thut vns der todte
verderben.